



FASNACHTSZYTIG FRAUERIEGE

„MIR BLIEBE DRA!“

Fasnacht: *abgesagt*

Fasnachtsfeuer: *abgesagt*

Oktoberfest
München: *abgesagt*

Konzert
Büezerbuebe: *abgesagt*

**Schnitzelbank
Fraueriege:** ***findet statt***

2020 isch ganz es bsunders Johr.
 Es chunnt eus wie en Albtraum vor.
 Eis ums ander wird abgseit.
 Do händ mir eus überleit,
 jetz dörf de Humor ned uf de Strecki bliebe,
 drum tüend mir im Zoom-Meeting
 Schnitzelbank schriebe.



Abstimmungen: *abgesagt*

Präsenzunterricht: *abgesagt*

Skimarathon: *abgesagt*

Turnstunden

Frauenriege: *finden statt*

Mir Fraue sind it hinder em Mond derheim
 und händ alli e Computer i eusem Heim.
 Mit settige Sache chöme mir drus,
 drum gönd mir am Mendig ned us em Huus.
 Mir mache den bim Zoom-Turne mit
 Und bliebe trotz Corona fit.



Am 3. Faisse, am Morge früh,
 ghörsch normalerwiis d Tschättermusig dur Wittnau zieh.
 Trotz „Wehwehli“ chasch mängi Fraueriege Frau gseh,
 au wenn sie vorher muess es Schmerzmittel neh!
 Das Johr müend mir ned früh zum Bett us go,
 aber s nächscht Johr hole mir alles no.



A der Fraueriegereis si mir uf de Benke gloffe
 Döt händ mir gesse und au gs.....Wasser trunke.
 Nachher gohts denn richtig los.
 D'Wanderig isch lang und ganz famos,
 Striehe, Chornberg, Uerke „ouu, mini Bei!“
 Mir möge nümm id Chrono und gönd grad hei!




De Christoph stost s Vespi s Cher duruf.
 Es verschloht ihm derbi fascht der Schnuf.
 Losch s Liecht lo brenne über Stunde,
 isch halt d Batterie au mal dunde!
 Stost er s Vespi Richtig Landi um de Rank,
 denn het er kei Benzin meh im Tank.

Am 29. Juli vom Morge bis Zobe,
 läuft d Bewässerig uf em Turnplatz obe.
 Am 30. Juli, wer hätte das gedacht,
 werde alli Dorfbrunne zue gmacht.
 Wasser gäbis bi eus nümm vill.
 Do weiss wohl der eint ned, was der ander will!




Im Gmeindsarbeiter gfallts bi eus ned so guet,
 drum isch er au scho wieder furt.
 De Brunnemeischer chunnt jetz vo Frick unde,
 das git halt echli meh Afahrtsstunde.
 Sie mache au s Bouamt, tüend Robidog leere.
 Bald regiere sie eus, die Fricker Herre!



Im Briefchaschte bi der alte Drucki unde,
het de Pöschtlter alti Briefe gfunde.
Er het de Chaschte lang it chönne ufmache,
s het Schneemade vor dra, das isch ned zum lache.
Bis jetz hets A und B Poscht geh,
jetz gits no Schneggeposcht weg em Schnee.



Der Markus isch jetz Füührwehrkommandant,
und het vor sim Huus au en Hydrant.
Bi de Nummere dra isch en Schruube locker,
de Hydrant stoht im Schnee, s haut eus fascht vom Hocker!
Jedoch het de Markus sini Mannschaft im Griff
und ernennt de Smile zum Kaffimaschinischt.



Am Bahnhof stoh ich und warte und warte
und möchti doch gärn zu mim Usflug starte.
So isch es s letscht Johr i mängem gange.
D'SBB het eus eifach lo hange.
Sie händ jede Tag 125 Verbindige usfalle lo,
will sie kein Lokfüührer id Usbildig händ gno.



D'Agenda isch leer, kei Verpflichtige meh.
Am Himmel chasch fascht kei Flüger me gseh.
Derfür ghörsch Alphorn und Jodle, s isch schön,
und am Sunntig vom Homberg Trompetetön.
Das Johr het au gueti Siite gha,
mir denke sicher no lang do dra.



Chinese, Amis, Italo,
ich säg dir, die sind all nüm froh.
Australier und au Franzose,
von Nord bis Süde chasch go loose:
Niene me chasch zäme fiire
nur wäge de Corona-Vire.






Oh Schock, in Wittnau Quarantäne,
glaubsch it, mir chöme `FASCHT` no Träne!!!!
Die Undere, ohjeh herrjee,
chasch zwee Täg mit Fieber gseh!
Dass`s alli gsehnd, ich tue it übertriebe,
tünd sis au no an Homberg schriibe!

De Cortesi Mario
isch wieder mol im Fernseh cho.
Zwei Meter Abstand nämeds gnau,
au wenn d`spaziersch mit diner Frau!!!!
In Züri, jo das muesch jetzt wüsse,
dörfst d`Frau nur no deheime küsse.



Bim erschte Lockdown, o herrjeh,
jo do chasch so viel Dummheit gseh.
D`Ichaufswäge pumpe voll,
chasch au nūme übere Zoll.
D`Regal sind leer, ich säge dir,
s`het ned emol me WC-Papier.

Im Chrono Michel säg i hey,
s`isch super guet dis Take away.
Statt Stammtisch, Kota, Gartebeiz
het öppis neuis e bsundre Reiz:
Zum echli romantisch si,
lad`sch din Schatz do here i.





D`Nancy, die het Hochzig gha,
und **ohni** Glogge seit sie `Ja`.
Sie züglet weg, weiss ned wohi,
im Fricktal will sie nümme si.
Doch eus tuet eis Problem umtriebe:
Was tüend mir ächt i Zuekunft schriibe?

Em Trump si Ära, die goht z`End,
de Biden nimmt jetzt d`Sach i d`Händ.
En Albtraum döt und eine da:
Donald T. und Nancy H.
`Die Schöne und das Biest` sind weg,
das het jetzt öppis brucht, au läck!




Im Kapitol z`Amerika
isch ändlich jetzt en andre Maa.
Em Trump sin Finger, oh herjee,
de chani langsam nüme gseh.
Und was ich au ned tue vermissee,
d`Fake News chönnd sich au verpisse.



D`SVP tuet wieder plane:
Vermummti chöme ned do ane.
Doch öppis finde-n-i no schräg:
Z`Basel a de `scheenschte Dääg`?
Und im ÖV und im Shop
gheisch use ohne Maske, hopp!

CVP mit neuem Name,
de Cassis weiss bald nüm wo ane.
D`Wegestetter Schuel goht zue,
de Werni het mit Wahle ztue:
für d`Staffelegg es Poschtulat,
nur weiss das dört e kein Gmeindrat.

Absage an Schule Wegenstettertal
Zusammenarbeit mit Gipf-Oberfrick kommt nicht zustande



De Chäspi denkt: für d`Hochzigsgäsch
wänd mir doch nur s`Allerbescht.
So muess er no en Ofe ha,
dass s`Chnolibrot guet bache cha!
Zwe stönd im Lager, oh herje,
sötsch ebe de wo lauft mitneh!

Endlich schneit`s, was für e Pracht,
d`LÜüt händ sich uf d`Pischte gmacht.
Abstand halt, Maske-n-aa,
würdsch meine d`LÜüt die dänked dra.
I de News do chasch denn gseh,
wie`s 1 Stund Schlange stönd, au weh!



Läde zue und Schuel dehei,
Homeoffice, au Fäscht gits kei,
Im Fernseh laufed alti Schinke,
de Lockdown tuet üs langsam stinke.
Alli hätted **jetzt** doch Ziit,
dass` endlich e neuu Turnhalle git.

Mariä-Fäscht Johr i, Johr us,
do chunnt so mänte nümme drus.
Au d`Gmeindskanzlei bringts nöd uf d`Reihe,
d`Isändig, die tuet abverheie.
Do en guete Tipp vo mer:
Gönd zum Christoph Küng i d`Lehr!

Öffnungszeiten Gemeindeverwaltung Maria Empfängnis

Am 7. und 8. Dezember 2020 (Maria
Himmelfahrt) bleibt die Gemeindever-
waltung geschlossen.

In wirklich dringenden Fällen wird unter
der Nummer 062 865 67 20 eine Pikett-
nummer bekannt gegeben.

Ab Mittwoch, 9. Dezember, ist die Ge-
meindeverwaltung wieder zu den ge-
wohnten Zeiten für Sie geöffnet. Besten
Dank für Ihr Verständnis.



D`Belgier chöme gern zu eus,
si fahred Ski, es isch nüt neus.
Us England isch no `ein` debi,
en blinde Passagier säg i.
Zrugg in Belgie heissts es chäme
5000 LÜÜT i d`Quarantäne.

Gwättered het ein vor Johre
und gschriebe zünftig wiene Mohre:
Em Christoph Küng sis wisse Gwand
hangt falsch a de Schopfwand!
Obs a de Tafle besser sig?
Au d`Meler intressiert das nid!



Beize und Teil Läder si jetz zue.
En behördlich verordneti Corona Rue.
Aber Fasnachtszyt isch jo glich.
Wenn ich id Gnossi go freu ich mich,
rund ume cha ich Fähnli flattere gseh.
Das bruche mir jetz meh denn jeh.





D'Manne vom Chor säged s'Konzert ab mit Schmärze,
 singe liit ihne jo so fescht am Härze.
 Wenns öpper im Fall doch ned het glaubt,
 und heimlich und lieslig i d'Turnhalle het gschaut,
 händ d'Strousselampe denn au die ganzi Nacht brännt,
 dass sich en Verwirrte nid de Chopf irännt.



Am Fasnachtsfüür gsehts denn ganz andersch us.
 Do goht am eis Znacht denn de Pfuus us.
 Wotsch vo de City Beiz denn ändlich hei,
 muesch ufpassse, susch brichsch no es Bei.
 Ich frog mi, wie isch das mit de Sicherheit,
 oder wärde Prioritäte do ächt andersch gleit?



Will eine am Fasnachtsfüür umgheit isch,
 und is Spital brocht worde isch,
 wänd s Marlen und de Smile go hole dä Maa,
 aber die zwoi dänket nid dra,
 dass es nid nur z Aarau es Spital git
 und de Dario z Laufeburg liit.




(Fürbitte an den Bischof)

Scho sid vilne Johr düend mir de Fasnachtsgottesdienst fiire.
 Zäme mit de Guggemusig die düend zwüsche dure eis spiele.
 Mir verzälle kei Mär nei es isch wohr,
 es sind tatsächlich scho über 20 Johr.
 Am Ändi vo de Fasnacht wänd mir nur no öppis säge:
 Uf die vieli Johr erbitte mir eus jetzt ihre Säge.

Hebsch de Fuess uf sis Areal,
nei aberau das isch jo fatal.
Mer glaubt's id doch es isch kei Witz,
du wirsch sogar denn au no blitzt.
Wenn ned erkennsch wer das isch gsi,
eini vo de Fraueriege wirds sicher si!

Dä Maa muess sicher vieli Fründe ha,
dass er muess luege wer er wott ie laa.
Und wer ihm nid i Chrage passt,
vo dem wird es Video-Foti gmacht!
Wie viel Dräck hett er ächt sälber am Stäcke,
dass er sich mues hinder de Kamera verstecke?!



Dur d`Boustell bi de Hauptstross z`fahre,
 für das bruucht de Schoffeur e guete Chare.
 Bim Jürg muesch hindere, bim Beni vöre,
 bim Erwin um d`Kurve und das halt mit Stöhne.
 Wenn das et machsch isch s`Annemarie do,
 als Paparazzi hindrem Busch vöre cho.




Schnitzelbanktelefon 0800 007

- wenn sie eine Schnitzelbank kaufen möchten,
drücken sie die Taste 1
- wenn sie im Schnitzelbank erwähnt werden möchten,
drücken sie die Taste 2
- wenn sie ein Feedback abgeben möchten,
drücken sie die Taste 3
- wenn sie den Schnitzelbank als Zweitleser erhalten möchten,
drücken sie die Taste 4 (gäll Andreas)
- wenn sie über ihren ungeliebten Nachbarn lästern möchten,
sind sie bei uns fehl am Platz!



Händ sie scho gwüsst, ...

- ... dass die Obere uf em Limperg au en Schwizerfahne gha händ, genauso wie die Undere uf em Homberg! Händ die kei eigni Idee?!
- ... wer sein Vespi liebt, der schiebt!
- ... dass d Männerriege jetz mit der Dameriege turnet. Aber nur per ZOOM, demits kei Virus-Ueberträgig git!
- ... dass wenn über es Boustellebrüggli wellsch fahre, muesch richtig stüre. Soscht landisch met em Vorderrad im Stroussegroube, gäll Bruno R.
- ... dass es nur gege telefonischi Voramäldig en Kaffi i de Neumatt 1 git's.
- ... dass d'Führwehr bim grosse Schnee d'Bärgstross gsperrt het und e Zuezogne het gmeint er cha trotzdem dure fahre. De David het s'Auto denn wieder zum Schnee us zoge.
- ... welle grossi Hit hät d'Nena vor «99 Luftballons» gha? ...De Luki, im Homeoffice, häts leider au nid gwüsst... (Lösung: «Nur geträumt»)
- ... en Wiehnachtsbaum cha mer in Witnau gratis abhole – muess aber ned! Und normalerwiis isch er ned als Garage-Deko dänkt.
- ... Gäll Annemarie, e so e Tafele stoht immer in Fahrtrichtig!
- ... dass bim Fraueriege-Zoom-Turne, immer am Mentig am halbi-8-i (Zobe)jedi Frau und jede Maa herzlich zum Mitturne iglade isch. Bitte meld di unter: yve.john@bluewin.ch





De Schnitzelbank gits nur online,
und lese chönned dir ihn derheim.
Geld müend dir au keis führe neh,
mir tüend euch die Versli gratis geh.
Wenn dir eus doch öppis wänd spendiere,
chönned dir das i de Chrono deponiere.



Mir hoffe, dass sich s Läbe bald normalisiert,
und villes so wie früehner wird.
Denn chönne mir s nächscht Johr wieder umelaufe
und euch de Schnitzelbank verchaufe,
uf em Gnossiplatz bi Sunneschii,
Guggemusig und eme Gläsli Wy.

